

浙江文叢

袁枚全集新編

〔第三冊〕

浙江出版聯合集團
浙江古籍出版社

浙江文叢

袁枚全集新編

〔第三冊〕

王英志 編纂校點

浙江出版聯合集團
浙江古籍出版社

小倉山房詩集卷二十一 戊子己丑

聞樹齋侍郎領威遠大將軍印鎮守北路寄詩奉懷

侍郎持節鎮樓蘭，都護新開幕府寬。我輩尚將儒者待，朝廷久當重臣看。瞻來福相三軍喜，傳出華年九塞歡。立馬天山莫回首，望鄉臺恐在雲端。侍郎年未三十。

想見趨庭話別離，相公有淚敢輕垂？從來効力沙場日，即是承歡膝下時。充國行軍寧慎重，班超見事勿稽遲。只今絕域皆州郡，說與呼韓知不知？

通家有客感離群，一障乘邊信屢聞。麟閣行看君上畫，燕山應待我銘勛。新詩《敕勒》軍中曲，舊夢橫塘水上雲。倘奪焉支好顏色，江南兒女要平分。

侍郎和

羨煞香披九畹蘭，謫仙到處水雲寬。隨緣且自紅塵住，厭俗頻將白眼看。爲子買春渾得計，以山作壽好承歡。何如迢遞天涯客，獨抱愁思渺萬端？

阻隔關山悵遠離，苦吟無那首低垂。行踪碌碌緣何事，後會茫茫更幾時？萬里寄書

真不易，三年學步莫嫌遲。邇來情景憑誰告？縱使通家未得知。

身如旅雁少同群，消息親朋杳不聞。敢望功名追定遠？每因風骨憶司勛。飄零舊雨疏新雨，遮莫江雲恨塞雲。漫向胭脂山悵悵，儘多相思與君分。

夜坐

夜坐西窗雨一齋，眼前物理苦難猜。燭光業已猛如火，偏有飛蛾陣陣來。鬥鼠窺梁蝙蝠驚，衰年猶是讀書聲。可憐忘却雙眸暗，只說年來燭不明。

郊外過故人墓

郊外作清明，垂鞭隴上行。故人如白雪，入土總無聲。

戊子榜發日作一詩寄戊午座主鄧遜齋先生

九月十一日，戊子秋榜懸。門外車馬走，徹夜聲喧闐。群官一簾撤，諸生萬頸延。得者眉欲舞，失者淚湧泉。恐此得失懷，賢聖難免焉。我今五十三，登榜三十年。翰林曾一人，花縣曾九遷。掛冠廿載餘，萬念付雲烟。惟逢榜發夕，猶心動不眠。棘院一聲鼓，神魂與周旋。并非望子弟，胡爲情牽連？祇緣少也賤，歷嘗考試艱。四上不中雋，自信幾不堅。未知今生世，

與榜可有緣。於今痛久定，思痛輒隱然。苦記戊午歲，待榜居幽燕。夜宿倪公家，今莫江宗伯。昏黑奔躑躑。道逢報捷者，驚喜如雷顛。疑誤復疑夢，此意堪悲憐。觥觥鄧夫子，兩目秋光鮮。書我到榜上，拔我出重淵。敢云文章力，文章有何權？敢云時命佳，時命誰究宣？父母愛兒子，不能道兒賢。惟師薦弟子，暗中使升天。豈非師恩德，還在父母前？吾師在何處？渺渺五雲邊。見榜疑見師，感觸涕漣漣。有如駿馬老，重對孫陽鞭。又如燒尾魚，重過龍門巔。此恩此日酬，陸莊慚荒田。此恩異日酬，兩鬢驚華顛。不如歌一曲，聊寫心拳拳。無由侍絳帷，且憑鴻雁傳。

同年王白齋司寇典試江南晤後有作

文星聽說下丹霄，手把藜光照六朝。一代金蘭曾共譜，卅年雲海竟分鑣。秋官氣肅冰壺朗，桂子香深絳帳飄。知道《鹿鳴》歌罷後，定來招隱訪漁樵。

無人不誦主司賢，有客能談公少年。棘院雨沾雙屐濕，蓬山花採一枝鮮。乙卯同人關苦雨，後十年而公探花。倚來玉樹葭居後，飲到雞壇酒占先。此日八驕齊小住，聽人情話晚雲天。

答望山相公見懷

新詩讀罷儼鈞《韶》，逸響隨風嶺外飄。底事千年吹不斷？人間天上兩枝簫。

絢春園費幾平章，老去看花興倍長。
料得手栽非小草，舜葱堯韭禹餘糧。
江隄楊柳太風流，苦累東君憶不休。
爲道年來免攀折，縱無風雨也低頭。
偶過棲霞十月中，樓臺非復舊時同。
老僧識我還迎我，閒立斜陽問相公。

甘棠人去樹難堪，舊雨零星只二三。
聽說黃扉猶悵望，白頭人唱《問江南》。
白齋司寇道公作《問江南曲》。

落日

落日金盤大，遙山未敢吞。
松根明細草，天外表孤村。
似寫衰年意，頻驚旅客魂。
今宵新月好，未必便黃昏。

新月

新月出天上，長眉畫水中。
未能全夜白，已覺衆星空。
扶上非關樹，吹偏似有風。
與誰最相識？含睇曲欄東。

秋雨

秋雨太零星，秋山不復青。
荒江雙槳泊，孤館一燈聽。
落葉聲相雜，涼蟬語乍停。
衰年當

此夕，宜醉不宜醒。

春風

春風如貴客，一到便繁華。來埽千山雪，歸留萬國花。有情羅幔捲，無力紙鳶斜。慣送梅消息，孤山處士家。

揚州留別四妹

相逢莫怪倍纏綿，不到揚州已四年。兄鬢定教驚眼白，妹賢依舊舉家傳。書齋一榻呼僮掃，酒客連宵替我延。且喜公然作姑姥，手扶新婦拜簾前。

赴宴朝朝沉醉歸，累君相待夜眠遲。已沉玉漏聽炊粥，重剔銀燈乞改詩。半刻偷閑談往事，一聲說別問來期。風寒日短吾衰甚，此後行踪江水知。

拔齒

人生一小天，齒動如地動。初焉頭岑岑，繼之神汹汹。斜侵兩顴顫，旁攪雙耳重。爭長佯出頭，攔道強阻衆。一人既向隅，滿座爲之恫。一個既負矢，群鹿紛然鬪。欺我老顙頰，在家不食俸。憎我傾膠談，酸鹹多譏諷。故使病聲牙，舉箸如鑿空。烝食哀家梨，驚看鬼目粽。五

漿五饋愁，三齏三咤痛。我乃取蓍筮，遇《夬》變之《訟》。曰確乎可拔，勿爲造物弄。骨肉既已乖，甘苦何必共！周公誅管蔡，季友除共仲。早鋤當門蘭，莫倚將傾棟。果然楚鉗加，去之如決壅。啜汁免舌撝，反唇得家街。形殘神始王，奸黜賢乃用。口戕口既除，嚼復嚼益縱。群齒大欣然，含笑一齊送。

補齒

一齒既拔除，窪然存一坎。勢凹稊稗集，百貨無不攬。雖然寔能容，奈其自視飲！有客獻奇計，道齒去最慘。譬如列陣排，隊缺衆始撼。我能假後天，截玉爲君嵌。就齧裁闊狹，佯啗殊斬斬。縛以冰蠶絲，試以五和糝。齟伯見不疑，齟妻笑且頷。亡何對食盤，口柔自阿匿。盧播爲大嚮，欲取先喪膽。魚羊稱小邦，亦復不聞噴。有如螟蛉兒，一氣終難感。又如異姓王，虎視終眈眈。外強班雖齊，內懦色已黥。客道子胡然，宜喜不宜憾。世上利齒兒，虛名孰可噉？原非佐咀嚼，只可遮觀覽。試問齧然露，道僞夫誰敢？

題畫

萬里驚風浪拍天，桅竿易斷纜難牽。是誰獨立高峰上？搖手人家莫放船。

十月四日揚州吳魯齋明府招同王夢樓侍講蔣春農舍人金棕亭進士

游平山即席有作

魯齋明府今何遜，高才管領揚州郡。十月招人郭外游，風懷想見冷如秋。一舟艤向惠因寺，滿目天涯名士至。分明此會似當年，風景雖同人事異。紅橋轉出水盈盈，楓葉全丹柳半青。金粉微銷存舊色，龍華小劫動深情。憶昔平山山最小，狐兔荒墳雜秋草。六龍兩度作宸游，丘壑經營終未好。樵使雄心欲見才，回山倒海起樓臺。仙宮偷得鈞天樣，赤手擎將閬苑來。開門爛用水衡錢，繪影傳圖不計年。已把平沙成峻嶺，更將斥鹵變流泉。果然人力能移地，始信湖山不屬天。鑾輿一過仙香在，士女嬉游紛似海。酒氣烝爲十里雲，燈光散作諸天彩。一個監司盧大夫，短身古貌白髭鬚。手握牢盆能養士，算清禺筴便刊書。海內詩人半貧者，一時麇至推風雅。爭學彭宣拜後堂，甘爲夫差作前馬。夷門大會捧珠槃，從此紅橋酒不乾。自道歐蘇真再世，三賢祠內屢憑欄。旗亭雪滿新裁曲，上巳風和共采蘭。二分明月笙歌易，一片憐才意思難。功成身退稱知足，誰道危機有倚伏？度支冊上素王章，例竟門前來鬼朴。聖朝不忍下歐刀，盤水釐纓恩已渥。潘岳閒居竟不終，褚淵高壽真非福！一夕清霜萬瓦飄，巢傾卵覆不終朝。窟營轉覺馮驩拙，金散方知疏廣高。今朝酒客還盈座，曾受恩人有幾個？鼃錯方聞東市行，羊曇偏向西州過。嘆息滄桑自古同，河山如夢酒壚空。主人也是多情

者，清淚齊彈渡口風。

李郎歌

郎名桂官，將往甘肅，作歌送之。

我聞李郎名十年，去年吳下才交言。今年李郎來見訪，握手方知郎果賢。李郎色藝梨園中，李郎行事梨園外。不爲李郎歌一篇，那知大有傳人在？郎家舊住闔閭城，折取天香作小名。擷笛不吹銀字管，歌脣時帶讀書聲。受聘南州季姓家，纏頭教舞玉鴉叉。隻屢偶停游子足，三春羞殺此邦花！鏡中自惜紅顏好，西施不肯西溪老。直走長安隸太常，萬人如海知音早。上公樂部正需人，選入仙班寵賜頻。燕棲金屋難輕出，花傍高樓易得春。偶然城外笙歌集，天上人來地上立。分得星眸一寸光，頓增酒面千燈色。秋帆舍人二十餘，玉立長身未有鬚。把盞喚郎郎不起，怒曳郎裾問所以。郎言儂果博君歡，寸意丹心密裏傳。底事當場爲戲虐，竟作招搖過市看？一言從此定心交，孤館寒燈伴寂寥。爲界烏絲教習字，爲熏宮錦替焚椒。延醫秤水春風冷，噓背分涼夜月高。但願登科居上上，敢辭禮佛拜朝朝。果然臚唱半天中，人在金鰲第一峰。賀客盡携郎手揖，泥箋翻向李家紅。若從內助論勛伐，合使夫人讓誥封。溧陽相公閒置酒，口稱欲見狀元婦。揩眼將花霧裏看，白髮荷荷時點首。君卿何處最勾留？畢蔣熊姜當五侯。蔣御史用庵，熊比部蕉泉，姜明府某。四子非爲《講德論》，三生同上一鐘樓。郎名此際雖風動，郎心鎮日如山重。一諾從無隔宿期，千金只爲多情用。嶽嶽高冠士大

夫，喬松都要女蘿扶。日中原涉來營賻，千里輿駢代送拏。豈徒《周雅》稱將伯，直可東京喚八廚？笑他兒輩持錢易，紛紛多作無名費。誰肯如郎抱俠腸？散盡黃金偏市義。再入長安萬事非，晨星零落酒徒稀。惟有狀元官似故，鋒車又向隴西飛。年華彈指將三十，身世蒼茫向誰說？誓走天涯覓故人，拚將玉貌當風雪。會遲別早我神傷，此後相思路阻長。倘得令君香再接，定傾老耳聽《伊涼》！

長至前一日熊廉村中丞蔗泉觀察招同蔣心餘太史王田來明經陪侍封

公滌齋先生小西湖夜宴

畫錦堂開北海尊，尊前兩代白頭人。八州作督仍爲子，五鼎娛親更及賓。池水影搖冬日暖，蠟梅花鬥晚香新。一陽那待明朝復？此夕先看滿座春。

洛社高風誰繼者？多公雅志欲追尋。盤無海錯存真味，座有墳簞奏雅音。蔗泉觀察首唱一詩。三主三賓鄉飲禮，一丘一壑故園心。謝公指日東山起，轉惹閒鷗思不禁。

哭阿良

三女性柔嘉，名之曰阿良。年才五歲餘，識字二千強。每日清晨起，抱書來爺堂。授以唐人詩，脫口中官商。爲之小講解，口唯頭低昂。人或譽聰明，掉頭謙未遑。與妹尤賓賓，翱翔

兩雁行。賜一栗半梨，不肯先承筐。牙牙呼妹來，舉齒一齊相。偶弄小鱗燧，千日猶在箱。待妹弄者失，轉以己物償。女奴或欺凌，涕泣聲惶惶。爺爲笞女奴，含淚勸停撈。須臾握餅餌，依舊許奴嘗。乳不戀娼姆，周晬甘餵餽。食不索珍怪，粗糲皆引吭。受教如影響，趨善如風檣。朝來何所戲？持筆塗丹黃。暮來何所爲？剪紙作衣裳。雖不中矩度，亦頗具偏旁。春秋大祭祀，五鼓先嚴妝。學作男子拜，拱立東西廂。達官長者來，出見無俯張。都驚貌類爺，誤認好兒郎。方姬年四旬，無出自感傷。兒能解其意，投懷喚阿娘。恩憐過所生，步步相扶將。爺好治書齋，古玩堆琳琅。兒偶游其中，啞然道勝常。一坐不肯起，看爺治文章。聞爺患齒痛，手自進糖霜。知爺夜未歸，卧猶盼燈光。豈獨性慈孝？兼且態端莊。瞳神如點漆，額角亦正方。僉云長成後，其福未可量。我雖老無子，得汝愁竟忘。扶愛汝手軟，嗅愛汝體香。非徒垂暮年，借汝娛心腸。兼冀他日死，仗汝得埋葬。何圖兩日間，一病中膏肓！駟馬不及追，鐵室不能防。曇花忽然萎，小劫成滄桑。彩雲杳然散，那待炊黃粱？大母八十四，兩手抱兒僵。求醫更求佛，鼻涕一尺長。民母招兒魂，登屋如病狂。聲聲呼良歸，哀音崩垣牆。生母孕六月，恨極以頭搶。存者道如此，來者尚何望！爺讀萬卷書，不解一藥方。忝然作人父，搏頰自懲創。蒼頭來頓足，鄰嫗來憑床。都欲勸婉婉，先自淚汪汪。前日天雨雪，堅冰滿池塘。戲縛作銅鉦，招汝敲琅琅。今冰猶宛然，汝身先消亡。前年梁少宰，爲雛鳳求凰。我道太顯貴，門戶敢相當？今來作方伯，汝又避何鄉？昨日竹馬走，今日小棺藏。昨宵舞蹈處，今宵

涕淚場。有汝何喧闐，虛室生吉祥。無汝何闐寂，頃刻成僧房。我怕聞哭聲，但願早聾盲。朝出猶自可，夜歸魂俚俚。人生到此際，五内生刀鎚。明知大夢中，何者爲彭殤？其如情所鍾，未能學蒙莊。或汝悔女身，棄瓦欲換璋。故且入輪回，再沐三桃湯。可騎舊胎來，金環猶未涼。嗚呼然不然？仰視天蒼蒼。鄭侃女采娘悔作女身，死而轉男以來，名叔子。見《桂苑叢談》。

苔

各有心情在，隨渠愛暖涼。青苔問紅葉，何物是斜陽？

楊花

楊花與雪花，一樣無心緒。不管是何家，隨風但吹去。

相留行爲茗生作

金陵城，六十里，容不住一個茗生子。茗生疏俊人，一縱如脫鞵。衆人欲留之，籊籊爲口柔，我乃下筆不能休。皇帝甲戌年，我游揚州惠因祠。壁上詩數行，烟墨蒙灰絲。掃塵讀罷踊三百，喜與此人生同時。尾書茗生二字已剝蝕，其他姓氏爵里難考如殘碑。袖詩走出廣問訊，脣乾舌燥無人知。滌齋太史張飲間，提茗生名喜破顏。道是我鄉西江一才子，姓蔣名士銓。

意氣炯介秋霜鮮，筆如牛弩摩青天。善哉瞿所一物耳，恰是心餘、定甫、荅生名字有萬千。我訪荅生急如火，誰料荅生早知我。長安寄書來，錦字重重裏。從此琅函來，木札去，飛遞烟雲不知數！俄聞宴瓊林，俄聞登玉堂。果然我識青雲人，逢人指眼自夸張。終竟我爲石戶農，君依玉帝旁。相隔兩塵許，不知君貌之肥瘠與君身之短長。椒山仙人降靈異，灰盤大書擘窠字。勸荅生早歸，不歸肯將至。荅生驚疑下庭再拜問歸所，曰白門三重關，竹籬穿不完。此中居之安，大才藏槃槃。荅生諾而起，投袂具行李。海中三山，目不回視。全艙書，半艙米，一母一妻三兒子。新亭直上疾如矢，老夫嘻嘻迎倒屣。握手無他言，君家蔣山相待已久矣。君家一庭月，我家一壺酒。彼此間何闊，欣然二五偶。我因君而律嚴，君因我而吟苦。交易作嚴師，相期各千古。方恨不能構屋共君居，鑿壁窺公狀，徒看君乘山陰舟，一年一別心惆悵。胡爲乎不戀此間樂，忽作西歸想？韓憑云河大水深風淫淫也，而君將安往？周諺云大武遠宅不涉，而君將安訪？不如鍾山下，奉花輿，可以寧太夫人之起居；十廟前，聽雞鳴，可以助雛鳳之清聲。公子知廉能詩。君忖度之留可肯？我更爲君引例請。君不記某年冬至前五日，汗出如漿妖夢中。被人薦作遮須王，頃刻絳旗羽節迎乃公。阿嬭苦留不得計，泣拜北斗聲翁翁。公然奪出亢父懷，留在世界海，吹散鬼妾鬼馬如飄風。鬱單天子近情尚如此，何況朋友一氣相感通！我詩雖不工，較之佛經神咒將毋同！君心雖不寧，比之閻羅包老或有情。以此留荅生，荅生行不行？

謝徐雨亭貽山輶

一輛山車賜野人，勝他九錫捧朱輪。橫陳尚帶烟霞氣，敷坐剛容老瘦身。惹我心常思五岳，仗君游且趁三春。八騶何處傳呼響，可許花間步後塵？

題茗生黻佩圖

昔聞《祝牧歌》，今覩黻佩像。誰能爲此圖？兩賢屹相向。其一茗生公，檐檐神采王。雖披一品衣，仙骨仍倜儻。其一張安人，莊嚴菩薩相。雖秉婉孌姿，志在青雲上。其旁字萬行，絕節發高唱。如史遷《自序》，如列女書狀。當作護身雲，環肩生墨浪。覽像我已欽，讀詩心更仰。人生伉儷和，然後家業創。其如嘉偶希，兩美難頡頏。金釵雖千群，錦衾雖百輶。苟無佳人佳，依舊曠夫曠。多公才莫媲，妒公福莫量。可以學劉綱，雙雙朝蓬閭。可以學冀缺，媿媿相饁餉。我畫《隨園圖》，將公石上放。覺有此人容，雲山才跌宕。我見龐公妻，敢拜不敢望。嘆息天人姿，畫手非予誑。古有奚契丹，能畫相與將。丹青雖自高，富貴非余尚。不如此圖佳，願借作屏幃。子子孫孫看，夫夫婦婦樣。

紫雲曲爲霞川明府作

海棠一樹紫雲低，公子多情照眼迷。我是將軍肯開閣，憐他妖冶謝征西。
紅雪軒中對玉人，定情何物最消魂？一雙淺色金條脫，解下檀奴臂尚溫。
曾記香山《放鶴》詩，的應勝在白家時。臨歧替拭雙行淚，好事三生杜牧之。
戴上新妝卸故妝，司空也斷好回腸。不知他日雙飛燕，可記盧家舊畫梁？

齒疾半年偶覽唐人小說有作

耳中騎馬兜玄國，齒內排衙活玉窠。老去一身如渡海，五官無處不風波。

嘲柳

漫說多情楊柳枝，替人別後管相思。看他帶雨貪眠意，壓損桃花尚不知。

三月二十四日又生一女

五旬翁五年，三夢投三瓦。如迎鄉飲賓，三壽作朋者。幸而阿良亡，箕帚少一把。不禁心
惘然，獨坐口侈哆。明知齒就衰，望子臺可捨。何圖姬有身，故意來相惹？欣欣鳳將雛，嘿嘿

鐘又啞。湯餅黯無色，賀客詞亦寡。頗聞金石文，蜀中王子雅。無兒有女三，一妹兩阿姐。出錢五百萬，葬父平林下。慰情良勝無，陶公言是也。人生天地間，祥金常躍冶。徐登女化雄，任谷男變姤。無物堪認真，有子何妨假？權封雌亭侯，高策婿鄉馬。文裝妹喜冠，武縛木蘭幃。抱看滿園花，一笑吾其且。

南山有古樹

南山有古樹，童叟森海上。一任風聲上下吹，不隨草色東西向。憶自月宮栽幾時，移爲南國甘棠枝。棟梁自笑不中用，斧斤未許樵夫知。秋風蕭蕭月七八，青草吹黃黃草殺。朝聞五柞漢宮傾，暮說三花瑤島拔。此樹偏教歲月長，目閱滄桑心慘怛。白馬甜榴孰與群，將軍一坐便傳聞。偶有旌旗照顏色，從無依傍立孤根。一朝甘棠留，召公去，萬目睽睽看此樹。不慮心空螻蟻生，祇愁才大文章露。誰知此樹方槎枒，《角弓》賦成色更嘉？要知秋霜不能悴，請看春日何曾花！

偶作三絕句

小橋偶閑步，一笑對斜陽。高樹少低影，冷花多久香。
駭浪難驚魚，疾風不拔草。人愁石季龍，我道海鷗鳥。